

四庫全書

集部

欽定四庫全書

石倉歷代詩選卷二百十六

明 曹學佺 編

宋詩九十三

嚴羽

行子吟

行子在江海飄飄靡常踪有如芒碭野朔風捲飛蓬朔
風無休期飛蓬日千里散落天地間寧有復歸理胡雁

西北來一叫三徘徊何時別沙漠昨夜宿陽臺同羣一
相失羽翮常低推人物有殊性奈何惟此哀

又

昨夜客遊初結交重豪邁高冠湛盧劍志若輕四海白
首悔前圖蹉跎天一隅寒冬劍門道失路空踟躕深林
聚豺虎絕壁號猩鼯雪深車軸折征馬驚啼呼何當返
故處殮黍居田廬淚下不能禁腸轉如轆轤

我友遠言邁

朔風卷秋樹白日寒無光是時鴻雁來四野何蒼茫我
友遠言邁使我結中腸如何携手歡一旦成異鄉行旅
有期程遊子多悲傷置酒欲高歌淚來沾我裳四座慘
相顧征馬亦傍徨未知會面日且復盡茲觴

悠悠我行邁

悠悠我行邁邈在天一方道路無終極時節異炎涼路
逢故里親揮泣問我鄉妻子別離久不知今存亡中原
多白骨城邑聚豺狼遠去無僮僕思還絕餼糧寄語家

中人遠行良可傷

朝日臨高臺

朝日臨高臺
睽彼芳樹間
上有共棲鳥
和鳴何闐闐
爾乃慕儔侶
我胡獨不然
良友在萬里
邈然河與山
聚會豈不思
歲月倏已殫
未必無他人
要非心所歡

仙遊

憶讀玲瓏篇
來往虛皇閣
空見白芙蓉
秋風幾凋落
昨逢紫陽君
共有丹臺約
下視塵埃中
冠纓縛猿獲
世事

行若此悠悠復何託

其二

朝別簡寂觀夜行石鏡溪溪光照屋綠月色正相宜石
上三道士頽然好丰姿或弄金光草或把珊瑚枝憑風
招素手賜我一玉卮歎我事遠遊蕭颯朱顏衰長林孤
月落羽蓋何葳蕤垂垂乘之去棄我忽若遺明發聞無
覩但有青鸞啼

其三

瀑布似明月上有石梁橫矯首望東海正見蟾蜍生揚
輝天漢間下照蓬丘城桂實幾凋落姮娥空聞名咄哉
玉斧子不如白兔精靈藥不服食執柯獨何成迢迢彩
雲外誰吹白玉笙竦身一長聽予若出寰瀛

登豫章城

憂來不自得登城望高天寒雲四面起朔氣下長川脫
劍且却坐君知心惘然奈何平生志鬱抑江湖間凜凜
秋風來茫茫落日晚長憂生白髮沈想忘朝飯向來經

濟士本是碌碌人
蕭曹刀筆吏
樊灌屠販臣
徒步取勲業
漢道為光新
我今何為者
飄飄去鄉國
狂歌豫章城
醉卧風江碧
但取英雄笑
終慙侗生名
當以德載事
耻因人成獨
酌還獨酌
哀歌還寂寞
安得凌風翰
為君拂寥邈

遊臨江慧力寺

舟中望古剎川上移琴樽
隱隱林閣見迢迢
鐘梵聞列岫不離席
驚濤常在門
風帆與沙鳥
汎汎隨朝昏
天高

一幡掛室靜衆香焚烟起多近郭鴉歸無遠村松際尚
微雪經年來暮猿賞惟靜者契法對高僧論安得息塵
駕永懷瞻獨圍明朝別此去惆悵滿松雲

山居即事

稍欣入林深已覺煩慮屏霜果垂秋山歸禽度嵐嶺紛
紛葉易積漠漠雲欲澗底寂無人松蘿窅然暝惟聞
山鳥啼月上柴門靜終歲寡持醪延歡聊煮茗羣書北
窗下帙亂誰能整

廬陵客館雨霽登樓言懷寄友

終日坐汾澳邈然無少欣登樓一周覽始見萬山羣微
雨洗殘暑青天捲浮雲襟懷兩廓落朗若見夫君見君
君何在顧影還獨笑吏非金門遊隱異滄洲調江明秋
月白山空夜猿嘯徒事百卷文未返一竿釣留滯豈勝
愁非君誰與謀水寒終赴海雁遠暫賓秋舉世不可語
猶當傲巢由贈君三尺劍永駕五湖舟

別客

客鬢風霜晚離亭鼓角聞念君當此去把袂不能分
衡霍連秋氣瀟湘合暮雲愁心將落葉向晚共紛紛

訪益上人蘭若

獨尋青蓮宇行過白沙灘一逕入松雪數峰生暮寒
山僧喜客至林閣借人看吟罷拂衣去鐘聲雲外殘

出塞行

將軍救朔邊都護上祁連六郡飛傳檄三河聚控弦
連營當太白吹角動胡天何日匈奴滅中原得晏然

江樓夜月懷故山友人

昨夜江樓月思君好斷腸猿聲相應發山色更青蒼
楚塞來書遠閩關隔夢長今朝看愁髮為爾半成霜

有懷閩風山人

把酒忽惆悵君今吳楚間孤雲隨馬首風雨隔河關
心事竟安在此行殊未還空將百年意泣向寶刀環

懷南昌舊遊

昨在南昌府清遊不可窮杯行江色裏棹進月明中樓

笛吹晴雪菱歌漾晚風坐來懷舊迹萬里一飄蓬

江行

暝色蒹葭外蒼茫旅眺情殘雲和雁斷新月帶潮生天
到水中盡舟隨樹杪行離家今幾宿厭聽棹歌聲

塞下

鞍馬連年出關河萬里賒將軍思報國壯士耻還家大
漢春無草天山雪作花誰憐李都尉白首沒胡沙

三衢邂逅周月船臨別賦此

戎馬相逢日那知復此間客愁詩莫遣世事酒相關
江上孤舟在天隅兩鬢斑更將憂國淚滿袖送君還

還山吟

日暮望南山悵然歸思發如何山中客屢看城頭月
城頭月照女蘿秋石磴潺湲瀉碧流巖猿久別應惆悵
澗鳥相呼亦共愁城南故人與我好令我忘却歸山道
昨夜西窗夢到家忽驚千嶂芝花老朝來舟子從辭君
回首空江語尚聞別後莫嗟難見面相思只望嶺頭雲

孺子臺吟

去年醉與東湖別欲上衡湘泛秋月君家留我却遭迴
悵望還成阻脩濶西山縹緲翠屏開復憶滕王倒玉杯
經過始識洪厓井調笑重登孺子臺臺前呼酒折荷花
水淨烟明散落霞舉杯失笑君何在望斷行雲空咄嗟
故人別後還愁緒此都不是余留處興來目送海邊鴻
歸心掛在閩溪樹

思歸引

海上之草綠芊芊洞門一閉今幾年仙驥去時留紫鞭
掛壁見之心惘然欲歸即歸亦由我不待功成何不可
堯舜未能屈巢由自餘王侯何足遊武陵春水綠蕭蕭
就中亦有桑麻郊近聞秦人笑相語待我東溪種碧桃

送戴式之歸天台歌

吾聞天台華頂連石橋石橋巉絕橫烟霄下有滄溟萬
折之洪濤上有赤城千丈之霞標峰懸磴斷杳莫測中
有石屏古仙客吟窺混沌愁天公醉飲扶桑泣龍伯適

來何事遊人間飄飄八極尋名山三花樹下一相見笑
我蕭颯風沙顏手持玉杯酌我酒付我新詩五百首共
結天邊汗漫遊重論方外雲霞友海內詩名今數誰羣
賢翁沓爭相推胸襟浩蕩氣蕭爽豁如洞庭笠澤月寒
空萬里雲開時人生聚散何趨忽愁折瑤枝贈君別君
騎白鹿歸仙山我亦扁舟向吳越明日憑高一望君江
花滿眼愁氛氳天長地濶不可見空有相思寄海雲

送吳會卿再往淮南

故人身披紫綺裘腰佩寶玦騎胡騮英風俠氣橫四海
辭我遠向淮南遊淮南桂樹應猶在八公舉手遙相待
明月高懸五兩頭隨君千里過淮流十年鞍馬邊城道
又是邊城見春草春草萋萋路入秦長安北望空愁人
荆楚竒材多劍客感慨相逢思報國男兒事業早致身
青鬢須防霜雪迫我向人間久拂衣白雲相伴掩巖扉
調琴鼓罷清商曲愁見孤鴻天際飛

臨川逢鄭遐之雲夢

天涯十載無窮恨老淚燈前語罷垂明發又為千里別
相思應盡一生期洞庭波浪帆開晚雲夢蒹葭鳥去遲
世亂音書到何日關河一望不勝悲

將至潯陽途中寄諸昆弟

渺渺孤帆去幾程悠悠天際望湓城一身避亂辭鄉國
千里相思隔弟兄猿呌匡廬寒暮色雁過彭蠡帶秋聲
江湖此去多飄泊腸斷風塵遠別情

客中別吳季高

悠悠遠別半生悲
白日相逢又語離
海內風塵愁未久
天邊消息到何時
洞庭旅雁春歸盡
仄步寒潮夜落遲
惆悵孤舟從此去
江湖未敢定前期

寄郭招甫時在潯陽

夢向三江買釣船
掛帆西去白雲邊
窗開曉色香爐見
門落寒聲瀑布懸
百年酒興陶彭澤
四海詩名孟浩然
何日真尋塵外跡
焚香酌茗話先賢

送崔九過丹陽郡上荆門省親

江國歸心一雁牽
河橋分手數杯傳
千崖萬壑秋聲裏
匹馬孤帆落照邊
牛渚寒波翻極浦
荆門晚樹合遙天
他時莫枉瑤華問
南北相思各渺然

楚江晚思

旅思遙遙倦向南
誰家烟火起晴嵐
孤城歸鳥連寒角
極浦斜陽帶遠帆
楓葉自能悲楚客
竹枝何用怨江潭
今朝欲寫風波恨
千里書成手自緘

古懊儂歌

郎去無見期妾死那瞑目郎歸認妾墳應有相思木

其二

朝亦出門啼暮亦出門啼蛛網掛風裏遙思無定時

西陵望

西陵終日望不見有歸橈欲去頻回首寒江起暮潮

送友人

黯黯離筵夕照收江城羌笛起邊愁念君此去三千里
何處關山是楚州

羽林郎

貂帽狐裘塞北妝黃鬚年少羽林郎
灣弓不怕天山雪
生縛名王入建章


聞笛

江上誰家吹笛聲月明霜白不堪聽
孤舟萬里滿湘客
一夜歸心滿洞庭

吳中送客歸豫章

川城極目渺空波送爾歸舟奈別何
南國音書須早寄

江湖春雁已無多



沈定四車全書

石倉歷代詩選

十三

石倉歷代詩選卷二百十六

欽定四庫全書

集部

石倉歷代詩選卷二百二十七至
二十七至

詳校官庶吉士臣范逢恩

侍讀臣孫球覆勘

總校官進士臣朱鈐

校對官中書臣葉蘭

謄錄監生臣陳春熙

欽定四庫全書

石倉歷代詩選卷一百十七

明
曹學佺 編

宋詩九十四

表萬頃

出門

出門復入門
吾行竟安之
携書北窗下
翻閱聊自怡
有懷千載人
掩卷還歔歔
采采首陽薇
戀戀商山芝
一裘

或終身欣然釣江湄斯人不可作斯道日湮微目前稻
梁謀鳧雁方齊飛青田寂無音歲晚將疇依慎勿出門
去塵埃染人衣

菖蒲

康廬入吾懷十載馳夢魂踵門者何人遺余以芳蓀歡
然得其趣如對五老言幽姿出岩谷常帶冰雪痕塵容
為一洗兩目不復昏忽思三峽流褰衣涉潺湲因仍一
寸石浸潤九節根人言可扶老歲月須其蕃茲理諒不

誣吾將從綺園

從人覓墨梅

熏爐束詩魂茗椀驅睡思掩闌寂無營翰墨自娛戲山
寒溪正清月淡雪初霽橫斜兩三枝見說可人意天機
如胸中出手特餘事何時剪冰紈來對病居士

題余仲祥松齋

芳妍桃李場紛趨歛成蹊長松坐偃蹇遂爾不見知平
生異時人不與俗轉移蕭然塵埃中擅此丘壑奇窗虛

境逾清四壁風來吹抱琴揖蒼髯喜氣掀兩眉臭味既
與同相親不相違直期閱歲寒可但忘朝飢

行役

宿霧鎖山椒落月掛林側崎嶇歷岡巒髣髴阡陌秋
高風露寒道遠時序迫安得歸故園篝燈理書冊

羅溪橋

我來從西昌日日因塵土誰知羅溪橋淨若初過雨長
松列左右清風奏宮羽薄暮舍籃輿扁舟渡溪去

次伯仁善利閣小室韻

山林吾所宅夜月恒對影
焉知江上人一日過萬境
褰裳步崇臺有室妍且靜
徘徊不能去坐見四山暝

見雪

兀冥當語誰餉我一簷雪
吾廬本來靜得此更清絕
遙憐北海上往往已盈尺
鬻鹽人在否毋凌漢臣節

雨後

秋事雨已畢秋容晴為妍
新田浮攏耜餘潤溢潺湲
機

杼蛩聲裏犁鋤鷺影邊
吾生一何幸田里又豐年

用鄭浮梁韻簡園師

杖屨山蹊窄鐘魚佛界深
寒梅殘屋角春霽老牆陰
一水元無恙扁舟尚可尋
煩思掬清溜為我洗塵心

次胡伯仁韻

山長飛鳥急江濶去帆微
唱晚幾漁笛憑高一釣磯
從君濯冰雪滿袖得珠璣
三歎不能已歸來吟夕暉

送胡仲立入京

昔對延英日諸公歎弗如敢言天下事不負案頭書此
去朝雙闕懸知有異除榮途方駟馳未用曳長裾

次施真人韻

素鞵方多難丹砂倘一逢勿疑蕉覆鹿會見竹成龍澗
水遠仍潔巖花幽更濃行行望仙宇知在最高峰

厭原山中曉行

碧雞夜半聲啁晰喚起幽人步林樾秋高風露着林木
無數寒花泣明月松篁一徑宛如畫石溜涓涓更清絕

山巔便好結茅廬莫待他年鬢成雪

夜坐

爐火篝燈孰與同此心吾欲付冥鴻茅簷已作涉旬雨
蕙帳不禁連夜風一段清愁詩句裏十分寒事酒杯中
溪雲未敢安排雪且聽梅花試小紅

玉山道中時赴掌故之命

麥苗堆綠菜花黃一簇人家古道傍酒熟不妨邀里巷
年豐贏得事農桑世情只說官遊好客裏那知歸興長

我有平生簞笠在釣絲何日理斜陽

睡起書懷時諸公相勉再出

北窗終日廢書眠一枕清風值萬錢雲度茅簷輕冉冉
泉生石砌淨涓涓不嫌雨腳花間注要聽秋聲屋外傳
三徑初成吾欲老幕中何用泛紅蓮

有感時與李弘齋有約

去年今日西歸客曝背茅簷又一冬歲月催人雖迅速
簡編於我却從容知名焉用詩千首養病聊須酒一鐘

早晚杖藜脩水去故人相約許相從

懷范光伯再用韻

梅邊流水碧洄洄都把相思付折梅十載不禁雙淚落
一樽期慰九腸回驚殘蝶夢鵲空喜望斷馬蹄人不來
咫尺雲山尚如此天涯誰信得追陪

用黃子益韻二首

青衫日日困塵沙安用浮名與世誇已過半生真似夢
未荒三徑且還家恨無沈水紆香穗喜有寒泉淪茗花

袖却西歸遮日手園林幽處看桑麻
睡起歡然思慮少病餘猶覺應酬艱
招搖風月聊須竹收拾烟雲幸有山
但要世緣隨水斷莫憂詩債幾時還
追奔富貴非吾事且占林泉一味閒

題懷秀堂

莫教滿地長莓苔杖屨從今日日來
曲徑要隨松巷轉柴門須對石梁開
牆頭花木因時種案上圖書任意堆
幸有林泉堪寄老忍將雙腳踏塵埃

大雪次前韻

誰知天巧出玄機，但恠飛璫過眼奇。
瞑立風枝寒雀倦，愁吟冰谷曉猿飢。
蘆花洲渚月明夜，柳絮池塘春暮時。
此景人間不長有，寫真傳影正須時。

兀坐有感

意行曾到楚江腰，占得雙泉第一寮。
窗戶邃深鐘磬遠，客塵都向靜中銷。

癸亥夜夢

丙夜清眠正熟時
夢魂飛去拜丹墀
小臣乍得披肝膽
感慨分明涕淚垂

次余仲庸松風閣韻六首

飛花數點雨初歇
啼鳥一聲春正長
讀罷黃庭了無事
旋安銀葉試爐香

已著遺經洗此心
更尋流水濯吾襟
經旬不涉溪邊路
行帶苔錢如許深

霧閣雲窗先自幽
水深那更繞牀流
春深紅雨落桃徑

晝永清風生茗甌

簷間新燕幾時來
簷外閒花往歲栽
丹杏碧桃花落盡
綠陰低處結青梅

淡月籠花花映窗
好風吹竹竹浮香
夢回何處一聲笛
人靜山幽天正涼

為憐風雨趣春回
故着秋花到處栽
蘭菊從來盛風味
不妨環繞讀書齋

宿翠巖寺呈李弘齋僉判

匡廬勝處君曾到誰是淵明與遠公
幸有和陶詩卷在
好依蓮社此山中

寄宋居士脩叔求庵記

翠琰新刊照眼明流傳何日到柴荆
從今不恨論交晚
我亦碑中有姓名

日出

日出柴門尚懶開綠陰多處且徘徊
槐花滿地無人掃
半在牆陰覆紫苔

早作二首

井梧飛葉送秋聲
籬菊緘香待晚晴
斗柄橫斜河欲沒
數山青處亂鴉鳴

北窗清冷不成眠
風遞蛩聲到枕邊
試喚兒童捲疎箔
一簾花影月娟娟

秋

數聲牧笛日將晚
一曲樵歌山更幽
解帶盤桓小溪上
坐看紅葉汎清流

上元憶大梵明燈

經年不到豫章城
燈火遙聞鼓吹聲
却憶秋屏臺上寺
絳紗青玉幾長明

九日

籬落黃花尚自無
白衣猶未到吾廬
莫令此日負佳節
為展淵明采菊圖

次仲庸初冬即事

常歲霜天分外晴
一溪如練浸冰輪
今年風雨寧無夜



誰與溪梅作小春

君家秋實洞庭種
小子持來獨未黃
莫作蘓州書後夢
只今惟欠滿林霜

寄元齡弟

季也東歸何太遲
伯兮西望屢吟詩
茅簷昨夜雪深尺
人在蓬窗知不知

雪中再示元德元齡二弟

平生簞笠慣衝寒
長憶江湖把釣竿
昨夜北窗聞雪作

夢魂飛到子陵灘

青青窗外幾脩篁也學宮梅巧樣妝說與惠連須着句
雪邊春色到池塘

再用韻寄弟

無人低唱兩三卮一任瑤瑤滿眼飛羅襪暗塵應洗盡
月明吾欲看江妃

憶昔騎驢犯曉寒酒旗隨處認長竿灞陵物物皆詩句
不用牽船八節灘

眼前脩潔獨脩篁
屢倩東風洗曉妝
學舞腰肢困珠玉
可憐官柳在寒塘

再用韻

雪裏鷗盟故未寒
小舟南浦着漁竿
眼明似近月千里
衣冷欲迷雲一灘

余從元德弟借到西郎書齋朝夕其間今二年
矣題戲作病僧寮云

華髮蒼顏一病僧
向來文史頗關情
只緣世網無由脫

遂學枯禪度此生

病僧行脚歸來後
百事無心每閉寮
日射竹窗風葉亂
煙凝香鼎篆紋銷

寄元齡弟

莫怪窮年不入州
載書前已會盟鷗
市朝畢竟多塵事
且傍溪山靜處留

少年妄作功名想
說着長安喜欲狂
多病年來怕奔走
却思雲壑置藤牀

元齡弟寄悲秋四詩因次

支離病骨怯初寒
眼底清愁更萬端
勉和新詩寄鴻雁
江城夜月覓君看

余既得烏石岡西望葛壇在雲霄中相去雖遠
山勢不斷林木歷歷可數異時乞靈仙翁不
難矣喜而成詩寄葛壇主人

東西知隔幾牛鳴
山勢綿綿若引繩
待向岡邊結茅屋
幅巾遙禮夜壇燈

寄張仲符時得烏石岡地

今人那似古人賢一錘隨身日醉眠此老有靈應笑我

區區常費買山錢

寸田天地有長久此訣劉郎却未傳他日馭風蓬島去
謾留陳迹在山巔

酬余求之

枕中久已黃粱熟鏡裏從教白髮垂但得漁樵分半席
此生何必與人知

雨後輕窗無一塵
窗前松竹更清新
不妨踏徧莓苔地
遺我青鞋有故人

別曹教授

從渠柳色自青青
莫為行人賦渭城
只恐南牆舊時竹
誤隨風雨作離聲

江花坼柳太多情
長逐春風管送迎
我亦思歸歸未得
夜窗愁聽杜鵑聲

有感

三四知音總道山荷鋤吾獨在田間人言病驥猶堪秣
伏櫪何心十二閑

題老悟畫卷

吏隱三年楚水頭每隨鳧雁找扁舟歸來喜色驚隣里
分得瀟湘一片秋

石倉歷代詩選卷二百十七

欽定四庫全書

石倉歷代詩選卷二百十八

明 曹學佺 編

宋詩九十五

吳龍翰

飲馬長城窟

漢兵北伐胡飲馬長城窟此城何以高鋪填戰夫骨此
池何以深戰血化為汁秋風吹水腥馬聞亦辟易馬渴

可奈何要馬載金戈長安有遊冶走馬燕支坡

嘉禾沈園

景物何其異虛岩人力成清池沈鳥影高樹落蟬聲花
日樓臺麗香風簾幙輕客來堪一借莫恡百杯傾

重陽客中

客裏重陽近他鄉酒易沽秋風詩鬢短寒夜客燈孤
筇笠月穿破荷衣霜打枯有懷吟不就端不為催租

感興

閉門逃俗客携酒過禪關
竈古茶烟斷碑殘雨蘚癥秋
僧行影瘦夜鶴病翎寒
片月隨人到孤琴對佛彈

詩境

流水環詩境未容塵土侵
步迂莎徑曲坐占草堂深秋
句蛩分和山杯鳥勸斟
好懷無客共相對一瑤琴

謾題

放曠疎林下清風吹鬢毛
傍梅讀周易對酒歌離騷
詩思秋雲淡古懷明月高
五湖天地別烟水綠平篙

夏日書事

園林數間屋長掩竹笆籬亭柳拂棋局瓶花落硯池蝶
狂如被酒蟬咽似吟詩脫帽掛岩石涼颼入鬢絲

寄題友梅堂友梅迺吳竹洲之孫

公昔洲多竹而孫梅作堂月窗傳瘦影風壑度寒香友
也真魚水况兮可雁行相看動吟興時吐玉琳琅

吳越歸秋晚

湖海歸來晚園荒菊幾叢秋山吟骨瘦霜葉醉顏紅弔

影寒溪上懷人落日中青燈滋味永不用哭途窮

樂府三首

妾心江岬石千古無變更郎心江上水倏忽風波生
製衣寄夫婿妾有冰雪段中間連理樹不忍剪交斷
殘月小樓西鷓啼思欲迷妾夫在天南何不那邊啼

俠客行

擊筑復擊筑欲歌雙淚橫寶刀重如命命如鴻毛輕

牛首山觀揚子江

巨靈擘破此山石，鞭起九龍入空碧。山分為兩合不成，
夾住長江數千尺。九道驚湍相擊，撞雷聲怒發。誰敢當
金牛，恠獸不可數。往往殺氣侵肌，涼嗚呼蜀道古來難。
燒棧能斷人往還，一夫可敵百夫勇。天險惟有秦函關，
固知長江當城壁。立此界限分南北，東南王氣無窮年。
此江未必成桑田，君不見逆亮百萬鼓腥風。海鯨出鬪
天掃空，書生不能長鎗與大劍。只坐帷幄收奇功。

題國直先伯祖海潮賦後

銀山突兀滄海頭夜半鼓噪萬貔貅爭雄角力轉坤軸
旋磨塵世偕浮漚朝朝暮暮自消長誰言于此隨海鯁
鷓革裹尸已塵土未必怨怒卒不休看公立論屈前輩
筆端有力挽萬牛孤峰絕岼氣象古亦復燦燦珊瑚鉤
分明掘見陰陽根判斷造化之深幽玄機發泄天帝嗔
此文政恐雷電收不然亦似畫鳥跡長夜鬼哭聲啾啾
公自騎鯨去不返滿江明月蘆花秋

西湖曲

十里風光烟水白
峩我帝城紫霧隔
笛聲吹斷蒲葉風
鷺飛界破青山色
湖波鱗鱗織成縠
翠葢紅幢機上簇
長安富兒美少年
馬蹄踏踏香塵撲
畫舫誰家窈窕娘
半額鵝黃時樣粧
玉手折花嬌無力
花枝半折銀絲長
隔花躊躇意相屬
稍稍談笑聞餘香
頰陽西落漢水遠
無計問覓雙瓊璫
巫山高哉但入夢
安得插翮飛其傍
君不見吳姬采蓮
自唱曲君王尚在
舟中宿

春晚郊行

芒鞋竹杖出柴關
簡點園林脚不閒
翠幄初張花作局
錦棚成列笋為班
烟波鷗鷺春風外
桑柘牛羊夕照間
埜興不須邀客共
芳樽濁酒對黃山

秋日遊竹會寺

竹樹陰陰古道場
野仙仙去地荒涼
晚山俱似佛頭綠
秋草不如僧髮長
白墮莫辭今日醉
黃花仍作去年香
禪翁留客殷勤甚
相對藤牀語夕陽

嚴陵釣臺

青壁千尋屹曉寒何年人插釣魚竿烟霞不受衣冠玷
天地那如簟笠寬幸有同肩黃屋貴不妨伸脚白雲端
能令漢室祇增重可作巢由一例看

夜泊富陽

片帆東去逐鷗輕消得天公十日晴新酒一壺詩幾首
故鄉千里月初更烟收山翠指摩淨風軟江波熨貼平
苦是狂懷費消遣船頭吹笛到天明

散髮

玲瓏窗戶午晴時散髮林間自一奇
鳥睡香奩花影動
蟬吟涼境柳陰移
高山流水琴三疊
明月清風酒一卮
是要閉門妨俗客
休令到眼敗吾詩

行春次俞兄韻

幾日春愁不出行
園林又是了清明
春風桃李一場夢
夜月江山千古情
吟倚長松伺鶴到
坐分危石看雲生
此懷不解自拈出
謾譜離騷入笛聲

其二

多謝春風相此行馬蹄十里殘陽明故人楊柳正年少
知己青山舊日情思滿天涯芳草遠望窮江際暮雲生
同來佳客自不俗相對松陰聽瀑聲

坐中詠蟬韻得飢字

兩翼繞乾殼已離便升林木最高枝銀牀梧落秋風裏
金掌盤欹曉露時斷續翻成無調曲悲涼拈出苦吟詩
前身應是夷齊輩高臥西山自忍飢

白紵詞

吳宮烟水碧迢迢如鱗金屋凌琅霄北方佳人顏如花
素衣濯濯明朝霞雲母屏風珍珠箔香銷金鴨春寒薄
璧月流光羅綺筵白紵舞殘西月落君看月落夜潮平
吳江濶兮越江深吳王醉去越王醒

贈劉後村

騎却青鸞上禁林崖崖聲價重于金花磚日轉瓊箋暖
蓮燭星歸玉漏沈翰墨挈來三昧手絲綸畫出九重心
春風已築沙堤路天上虛皇屬意深

晚舟過臨平

烟鐘喚起夕陽愁
渺渺臨平春事幽
惟有風蒲愛吟客
岼邊撩亂綰行舟

春晚留淮上

淮山歷歷春雲澹
淮水湯湯夜月輝
此處杜鵑啼不到
江南行客未成歸

拜林和靖墓

老鶴高飛入白雲
空餘殘照管孤墳
清風千古鎮長在

見著梅花如見君

久客買舟西還

萬里烟波興渺然
愁心繫住灞橋邊
歸裝詩少不成載
自拗梅花湊滿船

宮人斜

碧玉重重鎮墓門
鯢膏點火照黃昏
春風幾度生芳草
還似君王舊日恩

嚴灘對月憶雪壺六弟

全君看月此徘徊
今夜月明君不來
安得清光刀剪破
為分一半到泉臺

水邊早梅

數花點淡帶寒烟
漏泄春光矮屋邊
會被清池寫疎影
一枝分作兩枝妍

題王荊公讀書堂

六籍紛紛盡可奴
翻騰字說乃留畬
可知山半青燈夜
只讀商君一卷書

繁昌道中

江晴日暖竹為輿
獵獵春風載此臞
湊入灞橋成一畫
楊花吹雪糝吟鬚

張麗華墓

金井輓轆春夢殘
香魂飛不到長安
君王為虜妾為土
夜月分為兩地寒

草堂

蒼烟落日草堂深
淺淺寒侵白玉簪
等客不來童睡去

自搖脩竹和新吟

春寒

二月漫漫雪滿山
羣芳擔閣未堪觀
亭間酌酒且沈醉
要為小園花暖寒

樓居狂吟

茆蓬悔著市廛間
長與青山面目慳
突兀小樓初結就
藤牀石枕卧看山

湖海真成萬里遊
寒風吹破黑貂裘
歸來卧占樓千尺

夢落滄波明月舟

樓間丹壁富藏書
悞學相如賣子虛
何不買牛勤教子
邵平瓜地要人鋤

覓得樓中一覺眠
將身化蝶入壺天
平生睡債何時足
春在梅花紙帳邊

附李燾詩

客懷五首

久客墮塵土
幽居懷翠微
只餘清夜夢
長作故山歸
菊

已開三徑松應長十圍晨鐘忽驚覺猶有露霑衣

寂寞三秋節淒涼萬里風關河盡形勝人物幾英雄秦
葉隨流水周禾滿故宮此心懸魏闕夢遶浙西東

壯矣府中縣索如城外村墨池今掃迹石笋舊餘根風
急漢絃斷雨多秦鏡昏新秋一懷古情緒若為論

雨意忽如此客愁將奈何出門誰可詣掩卷獨高歌塵
世免三穴古人蓬一窠區區奚足道默默幸無它

長憶在家好已知從仕難紛紛猶嚇鼠悄悄政栖鷺忘

意躡高位敢言卑小官世途真甚隘懷抱應須寬

過淨名院觸目都似曾到問訊乃非也戲題絕

句

入門髻髻記曾來問訊山僧始此回却覓舊遊無是處
只應形似遣人猜

世間形似巧迷人總是安排底處真縱復非真猶足喜
得來聊寄夢中身

附鞏仲至詩

東平人學
于東萊

曉起甘蔗洲

曉起東風惡晴嵐忽變昏船隨山共走霧與水相吞鉦
鼓遙知寨桑麻畧辨村雨來無準則容易濕柴門

夜雨曉起方覺

夜雨鳴簷送五更不驚高卧最多情窻間細視花無恙
牆外隨聽屐有聲數把柔絲堤柳嫩一奩方鏡開波清
出門眼界殊明潔但覺春寒處處生

晨征

靜觀羣動亦勞哉，豈獨吾為旅食催。
雞唱未圓天已曉，蛙鳴初散雨還來。
清和入序殊無暑，小滿先時政有雷。
酒賤茶饒新麪熟，不妨乘興且徘徊。

離建

旅中多得早朝晴，野潤衣襟苦未清。
時時數點雨猶落，隱隱一聲雷不驚。
山入夏來差覺老，花從春去久無情。
長汀又涉來時路，麥隴桑村小問程。

附徐致中詩

夏日懷美

流水階除靜孤眠得自由月生林欲曉雨過夜如秋
遠憶荷花浦誰憐杜若洲良宵恐無夢有夢即俱遊

夏夜同靈暉有作奉寄翁趙二友

齋居惟少睡露坐得論文涼夜如清水明河似白雲
宿禽翻樹覺幽磬度溪聞欲識他鄉思斯時共憶君

初夏遊謝公巖

又取紗衣換天時起細風清陰花落後長日鳥啼中水

國乘舟樂巖扉有路通州民多到此猶自憶髯公

夏日湖上訪隱士

煩暑何能避孤舟訪隱人水鄉菱藕熟晴野稻苗新為
學師前輩談空悟宿身鏡湖三百頃不似此湖濱

又寄

庭深自無暑苔徑復縈紆賓客不長到兒童自可娛荷
花晴帶粉蒲葉晚凝珠與我城闔隔茲歡想不殊

山居

柳竹藏花塢茅茨接草池開門驚燕子汲水得魚兒地
僻春猶靜人間日自遲山禽啼忽住飛走又相隨

登橫碧軒繼趙昌甫作

步陟高高寺徐行不用扶青天晴又雨山色有還無句
向閒中覓茶因醉後呼所懷論未足何乃又征途

不食姑

惟誦天童呪飲泉能不飢只緣多自譽番以致人疑賦
質全如鶴謀生却似龜綠華通籍後會報女仙知

六月歸途

星明殘點數峰晴
夜靜微聞水有聲
六月行人須早起
一天涼露濕衣輕
宦情每向途中薄
詩句多于馬上成
故里諸公應念我
稻花香裏計歸程

附姜夔詩

范大叅入覲頗愛鄙作以詩謝之

問句石湖老如將日
指標枯中說滋味
高處戒虛驕
頗喜唐音近
寧論漢道遙
正聲今在耳
萬樂聽簫韶

小孫納婦

慶事集朋親孫枝喜氣新歌雲停碧落舞雪眩青春暖
日花君子清樽酒聖人一春行樂地不負牡丹辰

呈方叔

聾牙落魄一閒官職事何嘗見一班不是論松須說劍
若非尋壑即觀山間看落葉隨風去冷笑奔雲送雨還
更有劉巖楊處士伴渠癡坐老花間

夏日奉天台祿

青天揮策卧藤牀翠袖攜壺過酒漿蝟腹出波烹芡實
裹蹄和露擘蓮房相呼時入雞豚社獨坐曾無鴈鷺行
便是赤城真隱吏不須劉阮更相將

冬夜不寐

宵柝迢迢警睡魔靜思甘分老林坡忍飢但有嵇康嬾
扣角曾無甯戚歌不起妄心思世事只將閒意養天和
時人休說長生術學著長生事轉多

閒詠

虛糜廩祿飲醇醪不押文書不坐曹簡點園花為日課
哀尋詩草計年勞仍將書冊供慵卧時喚杯盤佐老饕
感激大恩何以報惟祈聖壽與天高

負暄

不是羲和德澤流寒鄉何處覓溫柔絕憐天上黃綿襖
大勝人間紫綺裘旋挾胡牀隨影轉更攜書卷與閒謀
天和妙處誰能會欲獻君王却自羞

和陸放翁見寄

遙知三逕長荒苔解組東歸亦快哉
津岬紛紛羣吏去
船頭袞袞好山來
平時佳客應相過
勝日清樽想屢開
若許詩篇數還佳
直須追挽古風回

和陸放翁

午庭風雨撼高槐
一洗城頭十丈埃
老子坐間尋句好
故人門外寄詩來
勁鋒久服穿楊妙
鈍思深慚擊鉢催
清佩左符君未可
要聽吟思發春雷

寄汪尚書

五十年間歎濶疎相忘兩地復江湖書來筆底驚強健
詩去吟邊想步趨好對青山看歌舞莫嫌紅粉笑髭鬚
鳳毛已有哦松韻尚記金華舊範模

送朝天集歸楊誠齋

翰墨場中老斲輪縱橫一筆掃千軍年年花月無閒日
處處江山怕見君箭在的中非爾及風行水面偶成文
先生只可三千首回施江東日暮雲

石倉歷代詩選卷二百十八

欽定四庫全書

石倉歷代詩選卷二百十九

明 曹學佺 編

宋詩九十六

劉宰

東陽道旁涵碧亭

四山委蒼翠一沼湛清漣雲飛松竹礙石墮藤蘿牽泉
音亂絲竹鳥語賡笑言斯亭作者誰俛仰四百年棟宇

有興廢篇章足流傳官道紛往來此地曠周旋乃知造物意以遺靜者使我來早曠餘龜兆坼平田攀崖溯源委石竇鳴涓涓摩娑兩石魚變化定何年

訪陳廷瑞有感

間維有常度曜靈無停輶翩翩葉辭柯過眼綠已稠弱幹不盈尺忽已高岑樓念昔過庭日朋來悉良儔我年未成章子少無與侔我質本駑駘蹇步畏阻脩子如渥洼駒猛氣已食牛當時二老人笑語歡且酬門戶各有

託寧計才與不登門如昨日星紀踰再周前賢安在哉
體魄歸山邱

漫塘觀雪分韻得遠字

入臘甫自茲得雪殊不晚凝寒祛厲氣積潤滋麥本清
興浩無極步履忘足蹇扣門呼石交勁縮語猶蹇挾携
事登眺南去還北反所向遊目礙僂若虎就圈歸來漫
塘上四望與天遠簑重漁舟歸煙橫樵舍飯稜層敲瑤
池燦爛開瓊苑玉龍擁寒城銀海迷疊巘頗喜漫翁貧

覽富逾北阮呼兒具杯酌採掇翻蔬啖不辭多酌我自
愧飲河鼪少焉歛夕氛桂魄爭婉婉翻思造化工舒卷
意難忖方其陰風壯一噫萬象偃聚將藪澤平散欲天
壤混端疑冰山固可但拳石狼及其遂離析去去不可
挽日月麗太清草木被餘暖區分鏡出匣渙散渠決堰
向來天壤間了不計增損吁吸一氣爾人當解茲悃恭
惟聖明君憂民中繾綣方冬祈瑞應此日慰勤懇貴瑞
不貴多真宰亦知搏公等調元手聖世須補衮未應事

閒曠巖壑慣棲遊我智拙于鳩一枝聊自穩但喜占豐
年努力務耕墾

崇禧夜坐

淮浙千萬山茲山鍾秀異山中四時好雪景更佳耳危
樓俯八荒豈無超詣士春遊眩紅紫秋賞挹蒼翠衝寒
繚水崖問訊世能幾山神出奇觀似慰遠來意漫空飛
六花匝地掩蕪穢頗疑羣玉府飄墮人間世又疑姑射
僊與物洗疵癘意行輒有得曠望了無際更欲呼雲車

御風駕六氣舉酒酌初平逍遙聊卒歲

送友人歸茅山

峩峩三茅峰秀出雲雨上疑有避世士卜築便幽曠
菊英當朝餐蘭佩拂千障我行未之見徘徊幾惆悵子居
山之西昔聞今見之厭和下里曲浩歌商山芝山林久
寂寥遲子相發揮間關整車軸萬里端自茲

夜夢續句

乙丑四月四夜夢中得句云昏旦視生死又云不

種桃與李覺坐而思豈吾壽不延歟因就枕上足
而成詩

大化賦羣有脩短亦天只彭殤誰得失鵬鷄均適已我
今識其然昏旦視生死青青竹籬下不種桃與李老薺
怙春柔叢蒿麗芳旨耘鋤藉人力四時自終始屬饜幸
朝夕過計胡為爾勿笑趙孟偷甚矣吾衰矣

送李秀巖歸蜀

平生秀巖翁嘉遊輕朝衣聖朝重特招趣駕不容違我

金少川八十二
卷二百十九
豈匏瓜哉先聖固所希長江一萬里舟行疾如飛東南
盛人物十九飫甘肥頗藉子公力寧知伯玉非翁豈好
異同曰余起布韋豈比淮之水東下雜於淝論奏了不
阿正直鬼神依讒言嗟止棘曰歸詠采薇歲晏江濤平
雨雪從霏微懸知到家日花竹遶山扉

吳門道歸書懷

投閒三十年日與木石俱暮景際休明搜羅逮樵漁洪
造賜甄收羣公文薦書殷勤奉明詔婉戀辭田廬一寒

不自揣五窮暗柳榆行行步京畿迎勞多軒車眼青見
故人皆歎此老臞形容不自惜奈此氣昏愚席間迷舊
識筆底誤新書十目所共睹一語良非虛儻昧知止戒
不反田園居去去入脩門蹇步接天衢深虞眩聞見狂
易滋發舒顙天寫真情浩歌賦歸歟

贈九華程兄

君家九華山山翠常在目雞犬聲相聞山腰幾隣曲本
固枝葉蕃無若君之族當年紫橐翁一念盡親睦俸餘

不自有買田徧溪谷計口給之食昏旦常陸續吉凶更
資助當使有餘蓄只今大江南盛事君家獨君歸廣此
意勝處新卜築周遭植名花中間啟家塾少長驅之學
毋問親疎屬庶幾子又孫更衍無窮福亦俾作法人百
世流清馥

松風軒晚望

遠山亞歸雲黯淡與天一近山過餘雨淨掃峰已出式
喜鳩喚婦寧憂月離畢擔簦彼誰子蹇步泥沒膝舉頭

望天一笑失愁疾應知扶桑東明朝浴晴日

喜客泉

物我未忘情無情惟止水底事山中泉客來如有喜悠然鏡面平倏爾魚眼生依焉開笑面似與客逢迎客喜泉豈知泉笑客何有邂逅深山中聊結無情友

偶成二首

月下浮舟去雲邊曳杖行物華隨節換人意與秋清小圃蔬逾潤荒叢菊向榮幽尋元自好底用絆浮名

地曠晚逾靜山空月倍明
銀河橫灝氣石澗伴琴聲
颯颯迎風葉飛飛濕露螢
歲華行晚矣為爾一凝情

天台道中

花重朝霏散鳥啼春意深
風光自流轉行役負登臨
澗水流新綠山雲捲夕陰
病容兼白髮漂泊此時心

馮公嶺

地隘山逾峻人勤俗不奢
時培石上土更種竹間茶
接畛田成篆連筒水濺花
征塵如不到老我即東家

長林場海邊道士

海霧晚逾合，海風吹更寒。
衰顏欺薄酒，老膽傲驚湍。
叢竹人家近，平沙客路寬。
明朝應更好，山翠撲征鞍。

松江道中

久作松江夢，重來泛短篷。
淡雲飛急雪，枯葉戰西風。
煙末三家市，波心一釣翁。
鴟夷身計耳，吳越等成空。

偶成

木落山呈骨，泉空水返源。
知時秋燕去，負日午蜂喧。
玉

粒炊晨甑金英卧晚園歲華今已暮身世兩忘言

送傅守伯成歸

煩暑歛清曉西風生遠林客懷感素秋歸夢越千岑
祖帳城南門藹藹萃華簪舉觴忽有贈去矣無遐心

其二

堂堂司馬公獨樂五畝園歲月坐成晚花木亦已繁
世事尚可為石交有遺言歸來默無語拊石弄潺湲

即事有懷

千山收宿靄一氣萬金行
爽吹舒澄碧晴暉麗太清
徘徊望前嶺徙倚步南榮
為問蓴鱸客何須身後名

儀真雍生見和因再用韻兼懷儀真

北觀憑欄望西橋信馬行
朋從有名勝風物正淒清
亂定人煙改春回草木榮
遙憐舊處壞壁暗題名

和韻呈李果州

行樂非吾事朋從慰此生
劇談忘夜永起立覺晨清
黃獨幽人供朱絃太古聲
他年盛山集不假退之評

丁亥冬感懷寄趙章泉

我屋方茅下君家閩楚交
鹿門知得計燕幕未安巢
澗谷泉堪飲山田飯可抄
應携靈壽杖雪藥嗅梅梢

題茅山滌墨池慶雲庵

路轉幾山腰地尋雙海眼
澗咽呂公泉橋橫蜀道棧
主人去不歸山空春事晚
何時具蔬筍開門延客飯

碧雲即事

唧唧秋蛩鳴耿耿秋夜長
簡編負初心枕簟怯新涼
朝

曦入疎牖宿雲散前岡歸歟一葉舟浩歌聽滄浪

送王穎叔分教山陽

向來肉食昧遠謀坐談欲復千古讎良平不逐勝詭遊
毛錐竟作書生羞楚山蒼蒼楚水流甲光向日金鱗稠
酒闌一笑看吳鉤將軍意氣傾九州先生身短智則脩
百鍊可使繞指柔安邊端藉帷幄籌泮宮還獻馘與囚
英聲南來動冕旒貂蟬未必生兜鍪

寄和趙章泉

章泉先生虎豹章餘子駭逐狐兔藏少陵遊不返衡湘
孤吟風月老林塘駕鴛鴦不送置我傍悵望空勞水一方
廣文別日天未霜殷勤寄音示無忘新詩寫作鴻雁行
憐我病骨猶未康續貂聊復寄歸航宮牆百雉如金湯
登門歲月知何當江湖極目煙波蒼

題解生山水圖

長江之水西南來江北江南圖畫開君從何處得此景
錦帆似泛長江回槎牙老樹連荒島兩兩人家出林杪

鷗飛欲下洲渚寬雲橫不斷關山杳圖窮雙嶼金焦峙
仙宮縹緲浮寒水拖樓振轉吳波平閭闔中天日月明

石翁姥

采石江頭風晝息掀天雪浪平如席
浚崖小泊客心寬攀蘿曾看望夫石
天涯望斷人不歸露寒猶想淚沾衣
爭似石翁携石姥年年對峙夾岡道
人歸人去我何心雨沐風餐人自老
比翼鳥連理枝年多物化徒爾為長
生殿裏知不知

過司徒墓

司徒墓荒塚累累不知數
草中翁仲無復存
壟上牛羊自朝暮
想見當時百萬松
佳城在處鬱葱葱
車馬時來卿相子
鐘魚聲出梵王宮
年深事遠無留蹟
只與耕夫資墾闢
萬古同成一斛塵
官爵高卑誰汝識

北固山望揚州懷古

北固城高萬象秋
煙竿一縷認揚州
試乘綠漲三篙水
要見朱簾十里樓
淚濕宮衣朝霧重
愁薰寒草夕陽浮

隋堤舊事無人問
兩雨兩垂楊繫客舟

過蘭亭

茂林脩竹翠參天一水西來尚折旋
欲泛羽觴追往事
悵無嘉客繼前賢
短章回寄二三友
勝踐堪尋八百年
笑拂蒼崖題姓字
為言曾此掬流泉

喜王節夫過訪

我方卅角子勝冠
我老君猶鬢未斑
可但孤生多疾疢
也輸華館富清閒
交情敢忘鶯求友
野性終便鹿在山

何日歸歟同里社杖藜來往翠微間

賀陳子揚致仕追贈父母

一笑相逢意自親別來庭樹幾枯榮
流傳郢客陽春句想見鴟夷萬里情
賈傅才能通國體柳州文字占時名
何如一棹洮湖去獨泛滄波弄月明

代李居士謁王去非制幹

僑居無地寄生涯布襪青鞋着處家
太乙虛舟想蓮葉玄都活計問桃花
不堪衆口貧為累坐使孤生髮半華

儻詐侏儒均賦粟不妨老子自餐霞

送邵監酒兼東儀真趙法曹呈潘使君

儀真來往幾經秋風物淮南第一州
山勢北來開壯觀大江東下峙危樓
沙頭縹緲千家市艦尾連翩萬斛舟
去去煩君問耆老幾人還得守林邱

懷徐表兄

一笑相逢句曲天別來十五換流年
忍思清渭瓊瑰詠無復通泉寶劍篇
北渚春回芳樹合西山日暮碧雲連

雁來數寄平安信無限相思若箇邊

毗陵邂逅京口同舍湯叔厚

雞犬相聞里社同琴書曾共客儒宮南樓夜醉三更月
北固秋吟萬里風去魯羨君勤採藻遊吳愧我尚飄蓬
相逢便與論心曲莫笑依然舊阿蒙

和張寺丞謝惠河鮑韻

鼎來佳句仰謙亨春入池塘草正生清夜擬陪簷雨酌
暮天應對碧雲橫逍遙莊叟一枝隱富貴齊人五鼎烹

戟衛肅迎揮手去蘇州應愧此時情

和湯叔永

底須彈鋏歎無家自有詩人賦子嗟平世豈應遺燭武
暮年安可傅長沙為隣幸賜千金諾進德相期一簣加
欲泛五湖觀浩渺興來還可共浮槎

送姜君王赴省

樽酒論文弱冠前交情老去只依然久荒三徑無來客
細撥清燈話昔年少日功名誰汗簡舊遊江海半華顛

君行試問都門柳幾送銀袍上九天

和題尊經閣元日觀雪

億萬飢民久籲天天開上瑞豈徒然深潭龜坼寒莎底
淺土蝗遺宿麥邊厲氣已消除日後祥雲飛墮曉風前
醉吟樓上瀛洲客為記三登第一年

送杜尉範秩滿還天台

眼看時事廢因循官路三年子獨勤袖有新詩頻教我
邑無長策可留君向來過計憂周隕此去何時靜楚氛

未必讀書盡虛語勉哉行矣張吾軍

謝湯生惠酒和來韻

聞道吾猶及老成高秋離索不勝情朋絨已喜賢從事
二缶那堪對麴生多病吾今同退鷁壯懷君可掣長鯨
能來共醉西風否木落千山夕照明

奉酬友人登多景樓見懷

雲橫不斷古神州縹緲河山總戍樓此地幾經人北顧
長江不住水東流犬羊萬里知離穴稻蟹三吳正得秋

人事天時多錯忤一杯聊復潤吟喉

漫塘晚望

霽色催雲作晚霞小橋却立岸烏紗
雨餘菱芡新抽葉秋早菰蒲未着花
燈影微茫行客艇鐘聲縹緲梵王家
沈吟索句輸公等我欲臨流理釣槎

寄題戴氏別墅

聞君築室水雲鄉一榻翛然獨老龐
近挹荷香供几案遠邀山翠入軒窗
自歌自笑遊魚樂時去時來白鳥雙

何日過門成夜泊一樽相與對銀缸

謝章泉再以前韻見寄

解印歸來白社劉風標靖節許同流詩來幾說鶯求友
老去自慙狐首邱會合由來天幸耳殷勤還識我心不
春回是處堪行樂能復携錢掛杖頭

送張端衡尉句容二首

梅僊西上古僊鄉梅蘂先春特地香自是邾人聞魯柝
懸知晉盜避秦彊名山久合清蕪窮巷猶聞缺蓋藏

卷一百十九
惠政由來要全美，須君努力佐琴堂。

其二

離鄉喜見似鄉人，君去家山祇北隣。
令長垂髻同里社，交承握手記城闈。
絃歌堂上寧忘舊，樽俎筵中必告新。
若也從容問無恙，為言魚鳥已情親。

送王去非服除造朝

疾風吹雨洗塵寰，北渚津頭水沒灘。
千里送君黃鵠舉，半生歸我白鷗閒。
清名已至雲霄上，逸氣還充宇宙間。

此去西湖回首淡煙疎柳認孤山

代東寄張端衡

句曲山頭白鶴飛
遙憐綵棒正宣威
仙家有喜迎仙吏
客路無塵點客衣
月澹郊原從犬卧
秋高籬落任雞肥
子真東野齊名在
莫向西風苦念歸

賀趙居父登第

詞場聞奪錦標歸
好是斑衣映綠衣
永日湖山供賞詠
好風宮殿正清微
堂新六桂光宸翰
庭秀雙芝煥彩闈

肯向長安誇得意年來伯玉已知非

送友人入京

郭內無田負郭居杯中得趣世情疎波間屢聽濯纓曲
架上時繙種樹書萬里長風摧岸柳一天清露屬園蔬
故人欲問平安信為說年來頗晏如

送李季允侍郎歸蜀二首

淮海身如繫岷峨路去賒相思冰雪裏却立嗅梅花
交情契金蘭燕樂非絲竹我歌古別離語盡君當續

題儀真常平倉壁

苦被微官縛此身
汗衣亭午亞紅塵
維舟醉卧垂楊下
輸與江湖自在人

過尤溪

尤溪塘上征人路
記得停驂一解顏
十載重來兒女換
似曾相識有青山

題馮公嶺旅邸

層樓傑閣聳朱欄
樓下行人自往還
但見綵雲橫木末

不知身在翠微間

題永嘉寺壁

石泉飛下寶蓮宮似聽鈞天奏未終千古風流謝康樂
將無屐齒此山中

舟過惠山

小立船頭看惠山山尖半在有無間蠶眠未老秧方綠
且放煙雲自往還

感春

隔溪啼鳥弄新音
繞岸蒲芽迸綠簪
花事只今強半在
不妨風雨攪春陰

七夕

天孫今夕渡銀潢
女伴紛紛乞巧忙
乞得巧多成底事
祇堪裝點嫁衣裳

天台道中用陳氏園亭韻

筓輿穿過萬重山
邂逅登亭一解顏
剩得題詩徧蒼石
舉頭羞見嶺雲閒

秋懷

一抹紅綃日脚霞
千林暮靄納歸鴉
西風捲盡梧桐葉
乞與中庭散月華

雲邊阻雨

輾轉無眠到夜闌
聲聲烏鵲近簷間
好風吹斷夜來雨
晴日放開雲外山

又用前韻

薔薇籬落送春闌
笋蕈園林早夏間
牛背牧兒酣午夢

不知風雨過前山

黃梅

林梢脆寔薦辛酸尚記兒時刮目看老去齒牙無復昔
曉枝猶喜墮金丸

題張瑞衡竹木石畫

槎牙高樹蕭稍竹絕島風煙開短軸更煩點筆作衰翁
嘯月吟風飲山淥

送劉簿秩滿東歸

一官簿領十年間此去青雲手可攀勝日西湖浮畫舫
頻將卮酒酌孤山

乙酉夏述懷

水邊舟子競招招陌上車塵晚更囂祇是幽人無事絆
藕花深處弄輕橈

得軒即事

上印還家不計年水光瀟望木參天綠雲洞裏開書幌
紅錦波心漾酒船

題瀑布畫

洩雲瀆洞遮山腹古木槎牙繞山足舉頭百丈瀉寒泉
知有高峰插天綠

回陳兄惠瓜

碧圓流液舌生津三載深慙拜賜頻莫怪尊前最知味
東陵自是種瓜人

九日送酒黃竹磡

老瓦盆中淥酒香田家風物近重陽不知竹磡盤桓處

今賦黃花第幾章

次李秀巖鶴溪

稻梁初熟社醅香
草草盃盤不着行
別後書來煩記取
綠楊堤畔水盈塘

石倉歷代詩選卷二百十九